

NORMATIVA DE GRUPOS E CENTROS DE INVESTIGACIÓN DA UNIVERSIDADE DE VIGO

LIMIAR

A LOU menciona os grupos de investigación como un dos niveis en que se organiza a investigación nas universidades. Así mesmo, os Estatutos da Universidade de Vigo refírense no artigo 103 á realización da actividade investigadora en grupos de investigación. Por outra banda, a Lei 14/2011, da Ciencia, a Tecnoloxía e a Innovación (BOE 2 de xuño de 2011) modificada no BOE do 6 de setembro do 2022, incide nas actividades colaborativas na investigación, e o Plan Galicia Innova 2020 da Xunta de Galicia centra un dos seus eixos estratéxicos no desenvolvemento das estruturas organizativas da investigación na Universidade. Este aspecto desenvólvese de xeito máis concreto na orde da Consellería de Consellería de Educación, Universidade e Formación Profesional e da Consellería de Economía, Emprego e Industria do 31 de decembro de 2022 pola que se establecen as bases reguladoras para a concesión, en réxime de concorrencia competitiva, das axudas para a consolidación e estruturación de unidades de investigación competitivas do Sistema Universitario de Galicia (DOG 02 de febreiro do 2022).

Por todo isto, resulta conveniente definir as distintas estruturas organizativas nas que pode desenvolverse a investigación na Universidade de Vigo, dende o grupo de investigación ata os Centros de Investigación, indicando en que consiste cada un deles, e elaborando a normativa que estableza a súa creación e composición. Por outra banda, é importante a coordinación entre as universidades do SUG, cara a utilización de criterios similares nos requisitos para os grupos de investigación, dentro do posible.

Ademais, a constitución de grupos e estruturas colaborativas de investigación debe acompañarse da elaboración dun censo destes, para coñecer de forma precisa a situación da investigación na Universidade de Vigo e poder establecer unha política científica axeitada, así como facilitar a difusión da investigación no ámbito empresarial e social.

1. GRUPOS DE INVESTIGACIÓN

Os grupos de investigación constitúen a estrutura básica para o desenvolvemento, a organización e xestión da I+D+i na Universidade. Un grupo de investigación defínese como unha agrupación estable de investigadores e/ou investigadoras con capacidade plena para o desenvolvemento da actividade investigadora, con obxectivos comúns, e infraestruturas e recursos compartidos e suficientes para permitir unha actividade de I+D+i continuada e competitiva.

Os grupos de investigación son o resultado da libre e voluntaria agrupación de investigadores e investigadoras que son libres de adscribirse ao grupo que soliciten, sempre que respecten os compromisos previos adquiridos e o grupo receptor os acepte. Non se pode obrigar a ninguén a pertencer a un grupo de investigación.

Os grupos de investigación deberán tender á diversidade de xénero.

A Universidade de Vigo manterá un rexistro centralizado de grupos e investigadores/as da Universidade de Vigo, que será actualizado periodicamente.

As cuestións relativas á constitución, mantemento e rexistro dos grupos de investigación serán competencia da Vicerreitoría con competencia en investigación.

Artigo 1. Criterios para a constitución dun grupo de investigación

Un grupo de investigación deberá estar integrado como mínimo por 3 investigadoras/es doutoras/es das seguintes categorías:

- Catedrático/a ou profesor/a titular de universidade ou de escola universitaria.
- Profesor/a contratado/a doutor/a ou profesor/a axudante doutor/a
- Profesores/as eméritos/as u honoríficos/as.
- Persoal contratado nos programas: Ramón y Cajal, Juan de la Cierva, outros posdoutorais do Ministerio e da Xunta de Galicia (agás aqueles que están na súa fase de estadía), Oportunus da Xunta de Galicia e persoal investigador baixo a modalidade de investigador/a distinguido/a (Lei da Ciencia), Marie Curie (neste último caso sempre que teña adscrición á UVigo), Programa de captación de talento investigador de excelencia da UVigo.
- Profesor/a Asociado/a de Ciencias da Saúde (PACS).
- Persoal interino, sempre e cando ocupe unha praza das definidas nos parágrafos anteriores.

Con carácter excepcional, e coa aprobación da Comisión de Investigación, un grupo poderá ter un número de investigadoras/es doutoras/es inferior ao mínimo, cando a produtividade, composición total do grupo e/ou ámbito ou campo científico de actividade o xustifique.

Unha vez acadada a composición mínima, poderán vincularse con consideración de "membros do grupo de investigación":

- Profesorado vinculado contractual ou estatutariamente de modo estable coa Universidade de Vigo que non posúan o título de doutor/a.
- Alumnado de doutoramento oficialmente matriculado na Universidade de Vigo no período de elaboración de tese.

Adicionalmente, o grupo poderá rexistrar a vinculación de:

- "Persoal de apoio": aquel persoal, investigador ou técnico, vinculado de modo conxuntural

ás actividades do grupo mediante contrato laboral indefinido ou financiado con cargo a proxectos, actividades de investigación ou outros recursos propios, sempre que a duración da vinculación sexa superior a 6 meses.

- b. "Persoal Investigador colaborador": aquel persoal investigador pertencente a centros de investigación ou organismos distintos da Universidade de Vigo que colabore de xeito habitual e fidedigno nas actividades de investigación do grupo. Para iso deben contar coa autorización da institución á que pertencen.

En circunstancias excepcionais, e suxeito a solicitude debidamente xustificada e aprobación pola Comisión de investigación, poderán rexistrarse nos grupos en calidade de “persoal investigador colaborador” persoas en situación laboral de autónomos ou persoal de administración e servizos ou tecnólogos da Universidade de Vigo, acreditando a condición nos primeiros e coa autorización de xerencia nos segundos. En ningún caso poderá rexistrarse nos grupos a poboación non activa.

Para a súa inclusión nun grupo de investigación, o persoal de apoio e o persoal investigador colaborador deberá responsabilizarse de dispoñer das coberturas de seguro médico, de accidentes e responsabilidade civil pertinentes, en previsión de posibles incidencias en caso de presenza física nas instalacións da Universidade de Vigo.

O persoal de apoio e o persoal investigador colaborador non computará de cara ás convocatorias de axudas a grupos de investigación da Universidade de Vigo, salvo que as bases da correspondente convocatoria indiquen o contrario.

A inclusión nun grupo de persoal de apoio ou persoal investigador colaborador non supón vinculación laboral coa Universidade de Vigo a ningún efecto.

Artigo 2. Normas xerais e de funcionamento de grupo

Como índice de estabilidade e competitividade, un grupo debe acreditar que realiza actividades significativas de investigación:

- Participación como investigador ou investigadora principal en proxectos de investigación financiados en convocatorias públicas externas á Universidade de Vigo ou en contratos de I+D.
- Sexenios de investigación activos (obtidos nos últimos 7 anos), ou publicacións de calidade no seu ámbito.
- Dirección de teses de doutoramento.
- Patentes o promoción de empresas de base tecnolóxica (EBT).
- Contribucións de calidade resultado da creación artística.
- Actividades non lucrativas de carácter representativo ou de asesoramento para persoas físicas ou xurídicas e institucións distintas á Universidade de Vigo.

O grupo non poderá ser un simple agregado de investigadoras e investigadores senón que debe existir un obxectivo científico común: tema de traballo común e/ou complementario, utilización de técnicas e infraestruturas similares, colaboración en proxectos de investigación ou publicacións, etc.

Os grupos de investigación deberán establecer a súa adscripción formal a un Campus, Centro, Departamento ou área/s de coñecemento da Universidade de Vigo ou dos seus centros adscritos. En casos excepcionais, e logo de solicitude e autorización da Comisión de Investigación, poderase establecer a adscripción conxunta a máis dun Campus, Centro, Departamento e Área de

coñecemento, sempre que o grupo integre investigadores/as doutores/as vinculados/as contractual ou estatutariamente á Universidade de Vigo pertencentes a distintos Campus, Centros, Departamentos e Areas que acrediten actividade investigadora conxunta. En todos os casos, será necesario o informe favorable de aceptación da adscrición.

Adicionalmente, os grupos poderán adscribirse a unha Agrupación ou un Centro de Investigación, estrutura que se define máis adiante na presente normativa.

Os grupos de investigación poderán vincularse a un ou varios Centros de Apoio á Investigación, na medida que participen nas actividades desenvolvidas nos mesmos, e co visto bo da correspondente Comisión Xestora e a autorización da Comisión de Investigación. Así mesmo, os grupos poderán vincularse a un ou varios clusters de Campus de Excelencia Internacional ou autonómico, redes de investigación nacionais ou internacionais, ou iniciativas análogas nas que poidan participar.

Un grupo de investigación da Universidade de Vigo pode colaborar cun Centro Tecnolóxico vinculado a esta se se cumpren as seguintes condicións:

- O grupo presenta unha traxectoria previa en actividades de investigación e transferencia de coñecemento de calidade demostrable, e aliñada cos obxectivos do Centro Tecnolóxico.
- Existe un plan de actuacións que avale o interese da colaboración.
- Cóntase coa aprobación do Centro Tecnolóxico.

Un grupo pode ter unha ou máis liñas de investigación, para as que se poden designar investigadores ou investigadoras principais diferentes dentro do grupo, non necesariamente coincidentes co coordinador ou coordinadora, sempre que sexan membros doutores/as.

O grupo deberá designar entre as investigadoras e investigadores principais un único "Coordinador/a", que actuará de interlocutor a todos os efectos de xestión e administración do grupo. Deberá ter tamén dous suplentes no caso de vacante, ausencia e enfermidade.

A creación e disolución do grupo deberá solicitarse na Vicerreitoría con competencias en investigación, a través do rexistro da Universidade de Vigo, de acordo coas instrucións publicadas na páxina web da Universidade (<https://novo.uvigo.gal/investigar/idi-uvigo/organización-investigacion/grupos-investigacion/tramites-convocatorias>),

Os membros do grupo deberán respectar os compromisos previamente adquiridos.

A baixa como membro nun grupo de investigación, poderá darse a petición propia, ou polas seguintes causas: a finalización da vinculación coa Universidade de Vigo, o cambio de director/a de tese no caso de doutorandos/as, a inexistencia demostrable de actividades realizadas dentro do grupo. No caso de cesamento da vinculación coa Universidade de Vigo, a baixa será realizada de modo automático dende o Servizo de Investigación, sen ser necesaria a autorización do coordinador ou coordinadora do grupo.

As altas ou baixas de persoal nun grupo deben enviarse ó Servizo de Investigación, segundo os modelos que aparecen na páxina web da Universidade (<https://novo.uvigo.gal/investigar/idi-uvigo/organización-investigacion/grupos-investigacion/tramites-convocatorias>),

Se algún membro do grupo non cumpre os requisitos esixidos para a súa permanencia no grupo o coordinador ou coordinadora deberá comunicalo ao Servizo de Investigación á maior brevidade posible.

Os/As investigadores/as individuais son aqueles/as que están rexistrados/as no rexistro de persoal investigador e grupos da Universidade de Vigo (SUXI-RI) e que non están adscritos/as a ningún grupo de investigación. Un investigador ou investigadora individual pode integrarse como tal nun Centro de Investigación, e pode vincularse a Centros de Apoio á Investigación, clusters de Campus de Excelencia Internacional, redes de investigación nacionais ou internacionais ou iniciativas análogas, en función da súa participación nas actividades desenvolvidas, e coas autorizacións correspondentes.

Artigo 3. Procedemento para a constitución dun grupo de investigación e o rexistro de persoal investigador

Os grupos que cumpran os requisitos enunciados no apartado anterior poderán solicitar, a través do seu coordinador ou coordinadora, a alta ou a baixa no Rexistro de grupos e persoal investigador da Universidade de Vigo (SUXI-RI). Para iso deberán cumprir o correspondente formulario dispoñible na páxina web da Vicerreitoría con competencias en investigación e remitilo ao Servizo de Investigación, coa conformidade de cada membro. Unha vez verificado o cumprimento dos requisitos de composición, o Servizo de Investigación trasladará a solicitude á Comisión de Investigación para proceder, de ser o caso, á súa aprobación.

O seguimento e actualización dos grupos corresponderalle á Comisión de Investigación que validará os seguintes criterios:

- Solvencia científica e sustentabilidade do grupo.
- Calidade e competencia científica.
- Proxección e competencia nacional e internacional
- Capacidade de formación de investigadores.

O recoñecemento como grupo de investigación deberá solicitarse á Vicerreitoría con competencias en investigación principalmente no primeiro trimestre de cada ano. Para a creación dun grupo de investigación deberá facerse constar, como mínimo, a seguinte información:

- Nome do grupo e abreviatura/código deste.
- Componentes do grupo e conformidade de cada un/unha deles/as.
- Campus, Centro, Departamento e área de coñecemento de adscrición.
- Liña/s de investigación e investigadores ou investigadoras principais responsables destas. Se unha persoa responsable dunha liña de investigación se dá de baixa do grupo e non se presenta outra responsable alternativa, darase de baixa a liña automaticamente.
- Recursos dispoñibles (equipos, instalacións), capacidades de investigación, resultados obtidos.

Os grupos de investigación poderán, a través da súa coordinadora ou coordinador, solicitar a modificación da súa composición, así como dos datos que figuran no rexistro de persoal investigador e grupos de investigación. Estas modificacións deberán solicitarse á Vicerreitoría con competencias en investigación principalmente no primeiro trimestre de cada ano.

Realizaranse de modo directo, tras as comprobacións pertinentes por parte do Servizo de Investigación, as seguintes modificacións:

- Altas e baixas de investigadores e investigadoras en formación e perfeccionamento, persoal de apoio, persoal investigador colaborador.

- Substitución da coordinadora ou do coordinador.
- Eliminación, inclusión ou modificación de liñas de investigación, servizos, palabras clave, datos de contacto, códigos.
- Modificación do nome do grupo.

Será necesaria a aprobación da Comisión de Investigación para a seguintes modificacións:

- Altas e baixas de investigadores/as principais e membros do grupo de investigación.
- Modificación da adscripción a un Campus, Centro, Departamento ou área de coñecemento da Universidade de Vigo.

Artigo 4. Disolución dun grupo de investigación

Un grupo de investigación disolverase nos casos seguintes:

- Por solicitude do coordinador ou coordinadora e/ou a maioría de membros vinculados/as estatutaria ou contractualmente á Universidade de Vigo como persoal docente e investigador funcionario, profesorado contratado doutor, ou doutores/as contratados/as no marco de programas competitivos nacionais ou autonómicos recoñecidos.
- Se se deixan de cumprir os requisitos mínimos de composición durante un período superior a 3 meses.
- Se se dá de baixa a coordinadora ou coordinador do grupo e non se propón unha nova.
- Por non desenvolver actividades de investigación, por proposta da Vicerreitoría con competencias en investigación e coa aprobación da Comisión de Investigación.

En todos os casos, os/as investigadores/as e os grupos de investigación deberán atender ao cumprimento das súas obrigas e compromisos adquiridos. Non se autorizarán cambios na composición dos grupos que poidan vulnerar os compromisos previos adquiridos (p.ex. axudas de investigación vixentes).

Todo o persoal docente e investigador (PDI) vinculado estatutaria ou contractualmente coa Universidade de Vigo, con actividade investigadora, e que non forme parte dun grupo de investigación, poderá estar incluído en condición de “investigadora” ou “investigador” no catálogo, sempre que así o solicite. Para iso, deberá cumprimentar o formulario dispoñible na páxina web da Vicerreitoría con competencias en investigación e remitilo ao Servizo de Investigación; polo mesmo procedemento poderá solicitar a baixa ou modificación dos seus datos.

É incompatible a pertenza a un grupo de investigación e a condición de investigador ou investigadora individual.

Artigo 5. Condicións operativas xerais dos grupos de investigación

Na información que se rexistre para os efectos de composición do grupo, deberá reflectirse a figura correspondente a cada integrante do grupo, e no caso do persoal investigador colaborador, a entidade á que pertencen.

Unha investigadora ou investigador poderá pertencer unicamente a un grupo de investigación, incluíndo isto o caso de organismos de investigación distintos á Universidade de Vigo. Non obstante, isto non implica ningún obstáculo para que un investigador ou investigadora colabore en proxectos con outros grupos da Universidade ou doutras institucións, en calquera tipo de

convocatoria que o permita nas súas bases.

A pertenza a un grupo non obriga a participar en todos os proxectos e actividades do grupo. Non obstante, naquelas convocatorias destinadas a grupos de investigación nas que se concorra, a través do coordinador ou coordinadora, entenderase o acordo de todos os membros do grupo.

Cada membro do grupo de investigación comprométense a formar parte deste por un período de, polo menos, 3 anos dende a súa data de incorporación a este.

O/A investigador/a coordinador/a do grupo será responsable da actualización da súa composición no rexistro de persoal investigador da Universidade de Vigo.

Os grupos de investigación da Universidade de Vigo e as investigadoras e investigadores pertencentes a estes poderán acceder ás convocatorias de axudas á investigación da Universidade de Vigo. As convocatorias de axudas da Universidade poderán establecer a necesidade de estar previamente rexistrado na base de datos de grupos e as condicións de tamaño que se consideren convenientes.

A Vicerreitoría con competencias en Investigación emitirá os certificados de composición e/ou pertenza a grupos de investigación, de ser solicitados, e segundo os datos que figuren no momento da solicitude no rexistro de grupos e de persoal investigador.

A participación no rexistro de grupos e de persoal investigador da Universidade de Vigo implica a autorización de cada unha das persoas incluídas neste para difundir os grupos e investigadores/as, así como a súa oferta tecnolóxica e a experiencia rexistrada a través os proxectos nos que participan, publicacións e teses.

Todas as persoas rexistradas nun grupo de investigación ou como investigadoras ou investigadores individuais se comprometen a mencionar á Universidade de Vigo en calquera tipo de produción de investigación ou de transferencia derivada da súa actividade.

2. CENTROS DE INVESTIGACIÓN

Artigo 6. Obxecto

Os Centros de Investigación (en diante CI), como estruturas específicas de investigación que presten un marco legal axeitado as labores de investigación, desenvolvemento e innovación no ámbito da súa competencia que se realicen na Universidade de Vigo, e que teñan carácter estratéxico sectorial ou transversal, ademais de dar apoio instrumental, científico e tecnolóxico.

Artigo 7. Adscripción

Os CIs adscribiranse á Vicerreitoría con competencias en investigación da Universidade de Vigo.

Artigo 8. Funcións.

As funcións fundamentais dos CI serán as seguintes:

- a. Favorecer ou agrupamento estable de grupos de investigación ou investigadores/as individuais de xeito que a súa unión permita desenvolver ao máximo o seu potencial investigador.
- b. Establecer vínculos con outros axentes do sistema de innovación: universidades, empresas, entes de financiamento, centros tecnolóxicos e centros de investigación nacionais e internacionais co fin de promover ou desenvolvemento de proxectos de investigación.
- c. Fomentar a dimensión internacional e a excelencia da investigación desenvolvida.
- d. Realizar traballos de carácter científico e tecnolóxico ou actividades específicas de formación para os organismos ou entidades públicas ou privadas, principalmente do seu contorno xeográfico e social que así o demanden, mediante o desenvolvemento de proxectos e contratos de investigación de conformidade cos procedementos legalmente establecidos.

Artigo 9. Tipos de centros de investigación

Pódense distinguir dous tipos de CI:

- a. CI da Universidade de Vigo: formados pola asociación maioritaria de investigadores e/ou investigadoras da Universidade de Vigo.
- b. CI Mixtos: formados pola asociación de investigadores e/ou investigadoras e grupos de investigación da Universidade de Vigo e doutras Universidades ou organismos públicos ou privados de investigación, nacionais ou estranxeiros.

Artigo 10. Requisitos para a constitución dun CI

Para a creación dun CI, teranse que cumprir os seguintes requisitos:

- a. Tamaño, capacidade investigadora e de captación de recursos significativa, que será valorada conforme ao criterio da comisión avaliadora.
- b. Posuír un Plan Estratéxico singular.

- c. Posuír un Plan de Viabilidade Económica.
- d. Os Plans Estratéxico e de Viabilidade Económica deberán ser avaliados favorablemente por un comité de persoas expertas externas, formado por investigadoras e investigadores de recoñecido prestixio, designado pola Comisión de Investigación. Este comité deberá respectar na súa composición o principio de composición equilibrada de mulleres e homes, salvo razóns fundadas e obxectivas debidamente motivadas.
- e. Nos CI mixtos, a contribución dos/as investigadores/as da Universidade de Vigo no relativo a persoal e produtividade investigadora e de transferencia deberá ser como mínimo dun 30% e como máximo dun 60% do total.

Artigo 11. Procedemento para a constitución

- a. A iniciativa do Equipo de Goberno da Universidade, ou por solicitude dun ou varios grupos de investigación, a proposta para a creación do CI será presentada na Vicerreitoría con competencias en investigación, para os efectos de que se presente na Comisión de Investigación quen iniciará o procedemento para elevalo, se procede, ao Consello de Goberno.
- b. A solicitude de constitución dun CI deberá incluír:
 - Presentación do CI, incluíndo: nome e acrónimo, grupos ou investigadores/as que o compoñen, identificación do coordinador ou coordinadora da proposta, resumo dos obxectivos do CI e xustificación da súa existencia.
 - Plan estratéxico do CI, no que se contemplan como mínimo os seguintes aspectos: xustificación da existencia do CI, estratexia que detalle os seus obxectivos e o interese científico-técnico dos mesmos, así como os mecanismos que se aplicarán para mellorar a calidade e produtividade da actividade investigadora e o impacto dos resultados no ámbito social e produtivo, organización científica, funcional e de xestión do CI, mecanismos de avaliación externa periódica, política de persoal, instalacións e medios actuais e previstos, memoria de actividades de I+D e de formación.
 - Plan de viabilidade económica do CI.
 - No caso de CI Mixtos, autorización expresa da institución ou institucións colaboradoras.
- c. A Comisión de Investigación arbitrará os mecanismos para a avaliación das solicitudes presentadas, para o que solicitará o asesoramento dunha comisión de persoas expertas de recoñecido prestixio, externas á Universidade de Vigo e calquera outro organismo participante na solicitude. Esta comisión deberá respectar na súa composición o principio de composición equilibrada de mulleres e homes, salvo razóns fundadas e obxectivas debidamente motivadas. A avaliación realizarase tendo en conta os seguintes aspectos:
 - Estrutura e organización da investigación: tamaño, mecanismos de xestión e organización, infraestruturas.
 - Traxectoria investigadora previa da agrupación.
 - Calidade e viabilidade do plan estratéxico.
 - Plan de viabilidade económica.
- d. A Comisión de Investigación elevará o informe favorable de constitución dun CI, cando proceda, ao Consello de Goberno para a súa aprobación.

Artigo 12. Condicións operativas xerais dun CI

c

1. Todos os CI da Universidade de Vigo dependerán dunha Comisión Reitora, que estará constituída polo Reitor, Vicerrector/a de Investigación, Xerente/a, vocal que representa ao Consello Social e o director/a do centro. No futuro poderán incorporarse a esta comisión representantes doutras institucións e entidades públicas e privadas que contribúan significativamente ao sostemento do centro e participen dos seus obxectivos.
2. A organización funcional e de xestión dun CI estará constituída por:
 - a. un director ou directora que será nomeado polo reitor, informado o Consello de Goberno e a Comisión Reitora. O director/a poderá, a súa vez, nomear un subdirector/a, segundo considere. O director/a nomeará unha persoa con carácter de xestor técnico, responsable da parte económica, de contratación, planificación e recursos humanos.
 - b. Un comité de dirección o executivo, formado polo director/a e aquelas persoas con tarefas de responsabilidade de xestión e/o promoción da investigación no centro.
 - c. Opcionalmente, poderá constituírse un Comité Científico, formado polos investigadores/as principais das diferentes áreas de investigación do centro.
 - d. Tamén poderá ter un Comité Asesor Internacional que asesorará ao comité de Dirección e á propia dirección.
3. As características e competencias específicas de todos eles será detallada na correspondente normativa de funcionamento do propio CI, que deberá ser aprobada polo Consello de Goberno, tras informe favorable da Comisión Reitora.

Artigo 13. Sede e adscrición

1. Os CI non terán porqué estar vinculados a novos espazos físicos. Poderán ter máis dunha sede, e mesmo poderán responder exclusivamente a estruturas organizativas de artellamento de recursos humanos e equipamento científico sen sede física propia. No caso de ter máis dunha sede, unha delas deberá actuar como sede principal, vinculada á Dirección do CI.
2. A normativa de funcionamento do CI regulará os mecanismos de adscrición ao centro, que será aprobada pola Comisión Reitora. Cada investigador/grupo só poderá estar vinculado a un único centro

Artigo 14. Memoria anual e seguimento de actividades.

1. Os CI presentarán á Comisión Reitora unha memoria anual de actividades, na que se indiquen os resultados obtidos durante ese período e a planificación e estratexia previstas para o ano seguinte.
2. A Comisión Reitora arbitrará os mecanismos para a avaliación do cumprimento dos obxectivos dos CI existentes, e do plan de actuación proposto, autorizando, se procede, a continuidade da súa condición. Para esta avaliación, poderá contar co asesoramento de persoas expertas externas que serán seleccionadas respectando o principio de paridade de xénero, salvo razóns fundadas e obxectivas debidamente motivadas.

Artigo 15. Medidas de apoio aos CI

1. A Universidade de Vigo subscribira un contrato-programa co CI, formalizado co correspondente

convenio, que describirá as condicións, orientadas a minimizar a carga burocrática do persoal investigador e facilitar a xestión administrativa e económica, mediante a dotación de personalidade administrativa propia e outras ferramentas administrativas e orzamentarias específicas axeitadas.

2. Os CI serán considerados de modo prioritario, sempre que sexa posible, nos programas de axudas á investigación da Universidade de Vigo, así como nas propostas e solicitudes institucionais nos programas de captación de investigadoras e investigadores, financiamento de infraestruturas científico-técnicas e grandes proxectos.
3. Os CI poderán ser dotados de personalidade xurídica propia, se así o aconsella a evolución da súa actividade e dos resultados do plan estratéxico, e sempre de acordo coa lexislación vixente, co obxecto de facilitar a captación de recursos externos e xestión e estabilización de persoal, entre outros.
4. O goberno da Universidade poderá promover a creación dun Centro Tecnolóxico baseado nun CI, segundo a normativa vixente, cando os resultados do plan estratéxico, especialmente no relativo á transferencia de coñecemento, así o aconsellen.

DISPOSICIÓNS ADICIONAIS

- 1a. Esta Normativa entrará en vigor o día seguinte da súa publicación e tras ser aprobada polo Consello de Goberno da Universidade de Vigo
- 2a. Quedan derogadas as normativas, regulamentos, circulares, disposicións e resolución anteriores, no que se opoñan ao establecido na presente Normativa, e concretamente a “Normativa de grupos, agrupacións e centros singulares de investigación de Universidade de Vigo” aprobada en Consello de Goberno do 19 de xuño de 2012, modificada en xuño de 2019.
- 3a. Esta Normativa poderá ser modificada polo Consello de Goberno a proposta da Comisión de Investigación.

DISPOSICIÓNS TRANSITORIAS

- 1a. Consideraranse constituídos os grupos de investigación que figuren como tales no rexistro de persoal investigador e grupos de investigación da Universidade de Vigo (SUXI-RI), e que cumpran os requisitos mínimos de composición indicados na presente Normativa. Trala entrada en vigor da presente normativa comunicárase o inicio dun prazo de 6 meses para que os grupos rexistrados regularicen a súa situación no relativo a nomeamento de coordinador ou coordinadora, actualización de datos e composición. Ao cabo deste período, daranse de baixa automaticamente aqueles grupos que non cumpran os requisitos mínimos, quedando rexistrados os investigadores/as en calidade de investigadoras ou investigadores individuais.
- 2a. Os Centros de Investigación actualmente recoñecidos na Universidade de Vigo indícanse no Anexo I

ANEXO I

CENTROS DE INVESTIGACIÓN DA UNIVERSIDADE DE VIGO:

- **CINBIO**- Centro de Investigación en Nanomateriais e Biomedicina
- **CIM** - Centro de Investigación Mariña
- **AtlanTTic** - Centro de Investigacións en Tecnoloxías de Telecomunicacións
- **CINTECX**- Centro de Investigación en Tecnoloxía, Enerxía e Procesos Industriais.

CENTROS DE INVESTIGACIÓN INTERUNIVERSITARIOS:

- **ECOBAS**- Economy and Business Administration for Society
- **CISPAC**- Centro de Investigación Interunivesitario de los paisajes Atlánticos Culturales
- **CITMAGA**- Centro de Investigación e Tecnoloxía Matemática de Galicia